

熙
朝
新
語

余自少至老。以衣食奔走。嘗七上京師。側聞名公卿緒論。仰見

國家聲明文物之盛。上自

朝章掌故。下逮嘉頌謹謠。揚厲無前。新奇可喜。日有所聞。難以悉數。每擬筆之於書。往往記憶不真。歲乙亥。自滇南歸里。道出武昌。於市肆中得歛人余德水所輯

熙朝新語一書。展卷讀之。與余曩昔傳聞異辭。俱足互相印證。其書多采諸前人著述。中無一臆撰訛傳之語。且又旁蒐軼事。發潛闡幽。凡登臨耳目所經。巷議街談所及。自

國初至今二百年來。有關於政事文章人心風俗者。靡不具載。亟令生徒鈔錄成帙。

略加編次。釐爲十六卷。付諸梓以公同好。
書名撰人俱從其舊。示不敢掠美也。我
朝重熙累洽。久道化成。自今億萬斯年。詞
林佳話。藝苑名言。日積月累。不可殫麗。續
輯之作。以俟將來。

嘉慶戊寅春三月吳郡守鉅老人翁子敬
履莊氏書

熙朝新語卷一

古歎 余金 德水 輯

盛京長白山爲我

朝發祥之地。高二百餘里。縣亘千里。山上有潭曰闕門。周八十里。鴨綠混同愛渾三江出焉。明中葉有望氣者言其地將生聖人。統一諸國。山之東有布庫里山。山下有池曰布爾湖里。相傳有天女名佛庫倫浴於池。浴竟有神鵲銜朱果置衣上。女吞之遂有身。尋產一男。生而能言。體貌奇異。及長。母告之故。且命之

曰。天生汝以定亂國。其以愛新覺羅爲姓。語畢。母凌空去。子乘小舸順流至河。步登岸。折柳及野蒿爲坐具。端趺其上。適其地有三姓構兵不解。有取水者奇其貌。歸告衆。走問所來。具以實告。衆驚曰。天生聖人也。昇歸奉爲主。居長白山東俄漠惠之野。俄朶里城。國號滿洲。十數傳至。

太祖高皇帝。英明神武。滅哈達輝發烏喇葉赫諸國。開拓疆土。建元天命。再傳至。

世祖章皇帝。拯民水火。統一天下。我

國家億萬年無疆之福。肇基於此。考諸往古。元鳥降祥。姜嫄履武。後先同揆。信有真也。

范文肅公文程爲

本朝開國元勛。文臣第一人。天命二年。文程見

太祖高皇帝於撫順。偉其貌。詢知家世。謂諸貝勒曰。此名臣後也。天聰三年。從征有功。時官文館。尙未有大學士職銜。而文肅所領皆樞密事。崇德元年。改六館爲內三院。授秘書院大學士。每議大政。必資籌畫。八年。撥隸正黃旗。是歲

世祖章皇帝卽位。明年爲順治元年。四月闖賊陷明北京。明山海關總兵吳三桂來乞師。遂

召文肅於湯泉。決策進兵。時抱病力疾趨

朝。建議曰。自闖寇猖狂。中原塗炭。近且傾覆京師。戕厥君后。此必討之賊也。雖擁衆百萬。橫行無憚。揆其敗道有三。逼殞其主。天怒矣。刑辱縉紳。拷劫財貨。士忿矣。掠民貲。淫人婦。火人廬舍。民恨矣。備此三敗。行之以驕。可以一戰破也。我

國家上下同心。兵甲選練。誠聲罪以臨之。恤其士夫。

拯厥黎庶。兵以義動。何功不成。復言好生者天之德也。兵者聖人不得已而用之。自古未有嗜殺而得天下者。

國家欲統一區夏。非久安百姓不可。於是大軍遂發。扶病隨征。申嚴紀律。妄殺者有罪。二十二日敗流賊兵二十萬於山海關。我兵長驅而西。民多逃匿。爲艸檄宣諭。言義兵之來。爲爾等復君父仇。非殺百姓也。今所誅者惟闖賊。官來歸者復其官。民來歸者復其業。必不汝害。民心遂安。師入燕京。文肅建議首先爲

明帝發喪。易梓宮。備儀衛。文肅親紀其事。

國初有內三院。一國史院。二祕書院。三宏文院。各設大學士一員。學士一員。順治十五年九月改內三院爲殿閣。一中和殿。二保和殿。三文華殿。四武英殿。五文淵閣。六內閣。十六年初以覺羅巴納哈爲中和殿大學士。額色赫爲保和殿大學士。蔣赫德爲文華殿大學士。洪承疇爲武英殿大學士。文淵內閣未補人。裁三院學士官。另設翰林院。掌院學士一員。以折庫納爲之。十八年七月復改殿閣爲內三院。康熙九年

復改內三院爲殿閣。復設翰林院。

天聰八年四月。

太宗文皇帝命禮部考取通滿洲蒙古漢書文義者爲舉人。取中滿洲習滿書者剛林敦多惠。滿洲習漢書者察不害恩國泰。漢人習滿書者宜成格。漢人習漢書者齊國儒朱燦然羅繡錦梁正大雷興馬國柱金柱王來用。蒙古習蒙古書者俄博特石岱蘇魯木。共十六人。俱賜爲舉人。并

賜衣一襲。免四丁。宴於禮部。崇德三年八月。

賜新中式舉人羅碩、常鼎、胡邱、阿濟格、畢禮克圖、王文奎、蘇宏祖、楊方興、曹京、張大任、于變龍等十名朝衣各一領。授半箇牛录章京品級。免四丁。六年七月。賜新中式舉人滿洲、鄂貌圖、赫德、蒙古杜富、漢人崔光前、卞三元、章于天、卞爲鳳、綬朝衣各一領。是時取士之額雖少。名臣多出其中。

太宗文皇帝用范文程議。特選士於盛京。沈文奎登第一名。字清遠。浙江會稽人。世居曹娥村。客遊遵化。

大兵破城挈之行。受知登第。充秘書院纂修官。順治元年。竊從入關。累官至兵部尙書。人皆知

本朝開科進士第一人爲傅以漸。不知實自沈文奎始也。

順治二年丙戌科狀元傅以漸。山東聊城人。授修撰。官至大學士。榜眼呂纘祖。直隸滄州人。授編修。官至侍講學士。探花李奭棠。順天大興人。授編修。官至侍郎。是科會試首題百姓足君孰與不足。百姓不足君孰與足。次題見而民莫不敬。言而民莫不信。行而民

莫不說三題王道之始也。會元卽李奭棠。三藝渾穆。蔚然開國氣象。二甲七十七人。三甲二百九十三人。國初諸大老皆出此科。大學士四人。傅以漸。李蔚。魏裔介。馮溥。尙書八人。沙澄。高景。傅維麟。冀如錫。朱之弼。艾元徵。魏象樞。劉捷。督撫三人。袁懋功。朱之錫。林起龍。左都御史一人。劉鴻儒。侍郎十五人。李奭棠。石闕。張爾素。陳協。王天眷。胡兆龍。梁清寬。梁清遠。田六善。楊時薦。于嗣登。朱裴。李棠馥。楊運昌。王度。左副都御史一人。董篤行。右副都御史一人。張汧。通政使二

人。晉淑。載。劉士蘭。大理卿一人。王景祚。內院學士一人。夏敷九。

宛平王文靖公熙。順治四年進士。時年甫二十。改庶吉士。習滿書拔前列。

世祖召見宏文院。命以滿語奏對。大加褒賞。尋陞國子監司業。累官至大學士。

先時廷對策俱用四六。順治己丑科。

世祖臨軒策士。命不用四六舊套。劉子壯對策稱旨。親定一甲一名。與榜眼熊伯龍齊名。熊典試浙江。

一榜得三狀元。乙未史大成。甲辰嚴我斯。庚戌蔡啟
傳。士林榮之。

山陰孟月心永光。工寫真。明季薄遊遼東。後歸
本朝。以畫祇候

內廷。爲

世祖所知。

命內侍張篤行受其筆法。

合肥龔尙書鼎孳歸

本朝後。頗與涿州相國齟齬。當時兩非之。後顧黃公

弔尚書有云。天壽還陵寢。龍輻葬大行。義聲歸御史。
疏稿出先生。浮議千秋白。餘生七尺輕。當年溝瀆死。
苦志竟誰明。文人之筆能爲人文過如此。

順治己丑探花張次修天植。由編修至太常轉通政。
端午

世祖召入龍舟賜宴。人稱異數。

順治七年。織造龍衣機上有異光。三日不止。欽天監
占以爲一統天下。政治文明之瑞。

順治壬辰會試。分滿漢爲二榜。蒙古入滿洲榜。漢軍

入漢人榜。是科滿榜中式五十人。殿試一甲一名麻勒吉。二名折庫納。三名巴海。乙未科滿榜亦取五十人。殿試一甲一名圖爾宸。二名賈勤。三名索泰。自此兩科以後仍停滿榜。與蒙古漢榜合而爲一。

無錫鄒忠倚字子度。幼遊錢塘。祈夢于忠肅祠。見忠肅倚其身。授以瓜子一握。數之得五十四粒。因名忠倚。後間居。其夫人戲以瓜子排作狀元二字。壬辰會試中式五十四名。殿試果一甲一名。與夢俱合。

順治乙未冬。

召日講官五人進講。王熙講尚書堯典稱旨。並

命嗣後講官不必立講。遂侍坐。其後講官因得侍坐。自王熙始。

徐元榮字道力。順治乙未進士。

廷試時爲文敏捷。

上顧見起草。奇之。及

召對便殿。例舉少年習清書者中選。元榮列最後。

上問其年。對曰。臣年五十二。

上曰。不欺翰林居清要。須用不欺之臣。遂用爲庶吉士。

陳澤州相國初名敬。殿試榜有通州同姓名者。

上命加廷字以別之。官學士時奉

命進所作詩。

上覽其詠石榴子云。風霜歷後含苞實。只有丹心老不迷。誦之至再。官至大學士。仍兼經筵。故事大臣入閣不復侍經筵。兼之者桐城澤州二相。蓋曠典也。

涿州馮文敏公銓歸

本朝官中和殿大學士。順治十年。銓母范太夫人壽八十有七。

世祖特命畫史繪銓母像。加寶璽以寵之。

馮文敏公次子源濟。年十九成進士。改庶吉士。授編修。遷至秘書院侍讀學士。緣事降東城兵馬司指揮。遷淮安府山清同知。丁憂起復。授翰林院侍講官。至國子監祭酒。宦迹亦奇。

無錫秦松齡。順治乙未進士。改庶吉士。授檢討。召試詠鶴詩。有高鳴常向月。善舞不迎人之句。

上大加稱賞。以爲有品。

蔚州魏敏果。公象樞。順治丙戌進士。由庶吉士改刑科給事中。時

世祖初親政。象樞上言。宜慎起居。盡啟沃。責備時宰。人皆危之。

上深嘉納。在諫垣時。疏凡三十餘上。尋因事牽涉。左遷。康熙初

召授貴州道御史。具疏言。科臣余司仁欺罔不法。湖南布政使劉顯貴侵公帑。不當內陞。數年間。官至左

都御史劾最貪知州曹廷俞。薦舉清廉知縣陸隴其。又舉學道公明者二人。去貪墨者二人。吏治肅然。遷刑部尙書。上言臣忝司風紀。職多未盡。敢援漢臣汲黯自請爲郎故事。乞辭新命。而領現職。

上鑒其無欺。從之。仍加刑部尙書銜。嘗曰。法自天子。寬之則爲施仁。自刑官。寬之則爲骫法。以病乞歸。

御書寒松堂額

賜之。以寵其行。

順治己亥會元朱錦。上海人。由庶吉士授編修。先是

同邑潘尙書有家人朱錦。其子遊庠。入謝潘。潘曰。汝子係

朝廷士子。可以門生禮見。勿再論主僕也。因還其券。朱感泣矢報。潘曰。我富且貴。安賴汝報。朱籲請不已。乃曰。現今文廟圯壞。汝能修葺。賢於報我遠矣。朱欣然營繕。棟宇一新。此百餘年前事。至康熙壬子。會元公歿。同日文廟正梁朽壞下折。刻有建造人姓名與會元同。始知卽其後身也。

順治己亥狀元徐元文。康熙庚戌探花徐乾學。癸丑

探花徐秉義。同胞三及第。前明三百年來所未有。
馬章民世俊。性朴素。釋褐時貧不能具軒。策蹇驢。老
蒼頭攜宮袍隨之。傳爲士林佳話。

張文貞公玉書。文春容典雅。颯颯乎

盛世之音。其拖諾仙狼居胥山二碑。敘述

聖武神功。尤爲詳贍。足以昭示萬世。紀平定江南事。
紀滅闖獻二賊事。紀三路進師下雲南事。皆端緒詳
明。足以彰開國之鴻烈。紀順治間樂章及錢糧戶口
三篇。皆資掌故。紀陝西殉難官事一篇。足與史傳相

參。他若遊玉泉山記。遊化育溝苑後苑記。遊喀喇河屯後苑記。遊熱河後苑記。皆足掄揚太平愷樂之象。其餘碑誌亦多。

國初將相事迹。可備考。

益都馮相國溥。二十一歲鄉舉。報到。酣眠不醒。太夫人大驚。以水噴面。乃張目曰。夢登泰山。雲氣擁身。而行至一殿上。碧霞元君迎之。置錦幔。張樂飲酒未終。見海日如車輪。大驚而醒。醒時猶帶酒氣。

順治癸巳正月十八日夜大風。山東恩縣郝村陂中。

冰卓立成山。廣四丈。高二丈許。峯巒秀拔。谿壑迴環。一磴委蛇相通。觀者雲集。造物之巧有不可思議如此者。

卽墨藍見渚潤。順治丙戌進士。官翰林。性廉介不異儒素。故事直隸江南皆以臺員視學。

世祖特簡詞臣。以潤爲安徽學使。盡剔積弊。

上謂廷臣曰。居官如藍潤可法也。會直省監司多不稱。

上以翰林官習法度。以潤品行端方。出爲福建參政。

此詞臣爲監司之始。

嘉善曹子顧爾堪。順治壬辰進士。改庶吉士。授職編修。

召試瀛臺南院。

上霽顏顧問久之。嘗與吳學士偉業等同注唐詩。書成稱

旨。特被

褒嘉。儒林以爲佳話。

順治十四年二月。給事中張文光言。魯哀公誅孔子

曰尼父。漢平帝元始元年加謚曰宣尼父。後魏太和十六年改謚文聖尼父。唐太宗貞觀十二年尊爲宣聖尼父。明皇開元二十一年始進謚文宣王。元武宗至大元年加謚大成至聖文宣王。明嘉靖九年改爲至聖先師孔子神位。前祭酒李若琳不加攷訂。請易爲大成至聖文宣先師孔子。不過仍元武宗舊謚而不稱王耳。臣謂大成文宣四字豈足以盡孔子。請仍改至聖先師孔子神位。

上從之。

徐立齋元文爲諸生時。赴試金陵。船家一啞子見之。
忽迎笑曰。狀元來矣。後果如其言。造一船與之。俾溫
飽終身。

立齋官修撰時。嘗從

幸南苑。

賜乘御馬。

命學士折庫納執鞚。乃元文館師也。遜謝不敢。乃改
命侍衛。又嘗晚對便殿。夜分

賜饌。

世祖又問從者得毋饑乎。

命侍衛與之食。嘗被

命進孚齋說一篇。孚齋

世祖讀書所也。

上賜覽稱善。爲刊行之。

順治戊子順天鄉試。第四名張永祺。壬辰榜眼。第五
名戴王綸。乙未榜眼。第八名熊伯龍。己丑榜眼。同榜
三榜眼。亦奇。

鎮國公敬一主人。

世祖章皇帝之庶兄也。居瀋陽。性淡泊。如枯禪老衲。好讀書。善彈琴。工詩畫。精曲理。樂與文士遊。以康熙九年七月薨。著有恭壽堂詩。

法黃石若真。母夢應真入室而生。故名若真。學問淹博。順治乙酉以五經中式。丙戌成進士。由編修再遷祕書院侍讀。與時相不合。外用浙江道。調福建禦鄭寇有功。遷浙江按察使。平反王式誣告案。浙人詫爲神明。

新城傅麗農辰。修軀偉貌。鬚眉如戟。博學強記。嘗過

一友家。其女爲狐所祟。聞傳至曰。傳公正人。將來必貴。吾去矣。果不復來。傳中順治乙未進士。官至江西道御史。

國初時山東有李神仙者。游行京邸。庚子北闈鄉試前。有兩生密詢試題。曰。公等皆道德仁藝中人也。無庸卜題。出乃志於道全章。辛丑會試。又有以場題問者。李曰。五後四可。場中首題乃知止而後有定一節。次題乃夫子之文章一章。三題乃易其田疇二節。果五後字四可字。

吳縣黃端木向堅。父孔昭作宰滇中。姚江道梗不得歸。向堅於順治八年十二月徒步出門。涉歷艱險。周徧於犴犴之地。趼足黧面。至白鹽井始遇二親。以十年六月歸里。承歡二十年。父母歿。負土營葬。不再期得疾以殉。世稱完孝。好事者爲譜三溪記傳奇。至今世多演之。

趙恒夫吉士。讀書靈隱。偶憩冷泉亭。見文宗屏去騶從。攜一小童入寺。良久步行去寺。僧告趙云。黃公以尊名問僧。遞與文宗。云寺中有一士子。未識其面。夜

過千書聲不輟。當培植之。文宗唯唯而去。僧來報喜也。趙詢之方知所僦居之旁有黃中丞鳴俊者。係文宗房師。避靜寺中。絕無人知。前輩之斂跡韜光而不憚提獎後進如此。

句容笪重光未第時。夢其父曰。汝功名在朝天宮某道士身上。覺而異之。訪其人與訂交焉。旣而辛卯金陵填榜。卽某道士也。折卷到笪。官欲易之。道士已聞唱直書。官呵曰。爾知笪字如何寫。道士曰。竹下加旦字。官曰。數也。

國初時浙江用兵。諸暨陳氏女年十六。被地匪所掠。逼之不從。杭人郭宗臣朱瞻生尙御公者。方勦義藤。金贖難民。聞女之貞。亟贖之。方至家。忽友人贖一童子至。問之。卽其夫也。翌日贖兩姬。卽其母與姑也。正驚喜。問訊。間有兩翁踉蹌至。覓其妻。蓋卽女之父與翁也。兩家骨肉一時完聚。人皆以爲貞節所感。三人爲之治酒肴具衣帨。合卺而歸之。高義亦足多也。五岳皆祭於山。獨恒岳祭於曲陽。自漢宣帝神爵元年始。而恒山實在渾源州。相傳舜望於山川。北至大

茂山。大雪不能前。有石飛墮。遂祀焉。卽今曲陽廟。石長不滿丈。濶僅四尺餘。濮陽蘇侍郎穀。疑石晉後燕雲陷遼。宋遂遙祀於此。然史漢唐書之文甚明。不始宋也。沈存中筆談云。北岳謂之大茂山。半屬契丹。以大茂脊爲界。岳祠舊在山下。石晉之後。稍遷近內。今祠乃在曲陽。蘇說本此也。明宏治中。馬端肅公會請改祠於山。事下禮部。竟格於倪文毅公。按南園漫錄云。倪公父謙奉命祀曲陽。禱於神。神指旁侍一人與之生公。因名岳。以是固執不肯改祀云。順治十七年。

上允刑科給事中粘本盛之請。罷曲陽廟祀。改祀渾源。千年因循之誤。至是始釐正焉。

順治甲午。四明金良於鄉試前。夢見天榜解元乃金良也。寤而喜甚。及揭曉解元乃鍾朗。夢中僅見其半耳。又己亥八月再行會試。朱若臣士綬夢看榜。會元朱姓。單名金字。偏傍左邊不甚了了。因具呈禮部。更名鎔。榜發會元則朱錦也。二事相類。豈神或戲之與不然何其巧也。

養圖字麟閣。滿洲科目解元。幼貧。嘗爇馬通讀書。尤

好爲詩。滿洲文學之開。實自賽公始。而滿洲文字則創於達海公。故諡曰文成。

金壇蔣虎臣超。順治丁亥探花。以編修督學順天。事竣卽告歸。不過里門。沂巴峽至峩眉。寓伏虎寺。至癸丑正月。端坐說偈而逝。初生時其祖母夢峩眉老僧至其家。故幼不茹葷。至是果驗。

劉克猷字壯。少穎慧。讀書一日數行。屬文奇肆。中崇禎庚午舉人。領薦後夢神告之曰。爾須朱之弼作房考。方中春榜。及至京。偶出寓散步。見數童子攜書包。

經其門一童特秀出執手與談見其書上寫學名朱之弼也大驚隨至其家見其父乃閭柴廩者贈筆硯數事珍重而別後遭流寇之亂屢次不赴春官及本朝順治己丑會試之弼已爲分校得首卷卽劉也本朝最重易名之典京朝官惟閣臣尙書總憲得賜諡侍郎以下不得與如葉文敏方禕沈文恪荃以久在侍從朱端慤文運以廉介受知加太子太保皆予諡蓋異數也

順治乙未進士李贊元原名立由翰林遷御史奉

命按湖北。收漢陽大猾段世昌。杖斃之。世昌謂家人曰。少時遇道士。叩以終身。言他日遇非桃非杏非坐非行。卽祿盡時也。

長洲宋維新。懋禧。順治癸巳。補博士弟子員。秋闈報罷。卽絕意進取。多智略。三遇暴客。俱以計脫。晚耽禪悅。受戒。退翁和尚。常作八悔警言。曰。幼不習學。老時悔。富不惜福。貧時悔。酒不節飲。醒時悔。賭不戒貪。輸時悔。健不養生。臥病悔。忿不顧身。傾家悔。善事因循。臨回悔。惡念纏綿。墮落悔。真見道之言也。

崑山王聖開。室畢氏名著。字韜文。歙縣人。

國初時著父勦流賊陣亡。尸爲賊所得。衆議請兵復仇。著謂請兵則曠日。賊知備。卽於是夜率精銳入賊營。賊方飲酒。驚駭間著手刃其渠。衆潰。以兵追之。多自相踐踏死者。輿父尸還葬於金陵。子歸後裙布釵荆。無往時義勇氣矣。其詩集序中有云。梨花槍萬人無敵。鐵胎弓五石能關。又云入軍營而殺賊。虎穴深探。奪父尸以還山。龍潭安葬。又云室中椎髻。何殊孺仲之妻。隴上攜鋤。可竝龐公之耦。其自紀殺賊奪尸

事有云。相期智勇士。慨焉賦同仇。蛾賊一時淨。萬年固金甌。忠孝義勇兼而有之。可謂奇女子矣。

熙朝新語卷一終

熙朝新語卷二

古款 余金 德水 輯

康熙初孫芭瞻在豐爲侍講學士時嘗言。

聖祖勤學。前古所無。坐處環列皆書籍。尤好性理五經四書。所坐室中。顏曰敬天。左曰以愛己之心愛人。右曰以責人之心責己。皆

御筆自書。書法直逼歐顏。見章奏有德邁二帝功過三王等語。謂二帝三王豈朕所能過。戒羣臣以後不許如此。陸清獻公隴其嘗謹述其事。

靜海宮夢仁初名宏宗。久困場屋。一夕夢鄉前輩林會元春以一冊予之。春字子仁。因更名夢仁。康熙庚戌果中會元。

崑山徐司寇乾學爲禮部侍郎。時朝鮮使者鄭載嵩訴其國王受枉。語頗悖妄。乾學上疏劾其不敬。

上喜曰。此文有關國體。遂陞左都御史。已而王果上表請罪。

吳人張姓。以星卜游公卿間。嘗許繆念齋形狀元。康熙丁未果第一人及第。吳中驚以爲神。門外車馬不

絕。張亦自高聲價。累致千金。韓宗伯焚時教授陋巷。
託友代問。張厲聲曰。此人來歲當死。還問功名乎。及
韓中會狀。張遁去。

廬陵張貞生。少入塾受經。卽有志聖賢之學。官侍講
學士時。言事激切。

命下考功議革職。

上愛其才。止鐫二級。出都時。王阮亭司寇等賦詩餞
行。張留別詩云。秋風送客復乘船。江遠帆孤一夢懸。
焚草燈前期報。

國披肝殿上願回天

聖明豈是誠難格。臣慙還慙術未全。賴有宗工交勸勉。臨岐申贈繞朝鞭。歸二年

詔以原官起用。至京卒。嘗書至危是人禽之界。喫緊在義利之關。二語於座右以自警。

湖州沈閣學涵於康熙辛未閏端午。

御試紫禁朱櫻出上闌詩。

上闌至末句云結根幸荷滋培久。長抱丹心對紫微。嘉歎久之曰。沈涵故自不凡。

康熙四年十二月。兩江總督郎廷佐奏報溧陽縣民
獲玉璽。篆文人心惟危。道心惟微。惟精惟一。允執厥
中。十六字。

命貯寶庫。賞獲璽人顧起龍等各銀五十兩。

山東邱縣孝子王祚昌。刲肝療父。父病立起。奉
特旨給旌。後不爲例。

本朝高文良公其倬。詩爲勲業所掩。實一代作手也。
嘗賦

恩賞花翎黃馬褂詩云。冠飄孔翠。天風細。衣染鷲黃。

御氣濃。莊雅獨絕。

湯文正公既官參議。康熙己未舉鴻博。

召試授侍講。命錄平日詩文進覽。首篇係

親耕藉田頌。

上肅然改容曰。此

世祖章皇帝時事。又閱詩至末首。有年老才將盡。憂多道轉親之句。

上佇思久之。曰。何謂憂多道轉親。對曰。臣幼遭亂離。半生在憂患中。常隨事體認。於道轉覺親切。詩辭朴

拙。不勝惶恐。

天顏和霽。從容顧問甚詳。一時咸歎優禮儒臣爲國家盛事。

范忠貞公承謨。大學士文程子。初充侍衛。復舉壬辰進士。改庶吉士。授宏文院編修。官至浙閩總督。死耿逆之難。有畫壁詩傳於世。檇李董漢策。尙書份元孫。博聞宏覽。忠貞特薦以科道用。旋被臺參放歸。忠貞殉難後。浙人建祠於孤山。董往謁。詩云。淚灑西臺夢欲迷。怒濤風急拍長堤。天涯渺渺無知己。埋劍金庭

伴鶴棲。握機密。啟意躊躇。篋有陰符返五湖。却悔囊
錐猶未試。女牆望見夜啼烏。

康熙庚戌一甲一名德清蔡官贊啟傳。二名德清孫
司空在豐。三名長洲徐司寇乾學。卽於是年十二月
召對宏德殿賦詩。卽日被

命同直南書房。又同主順天鄉試。爲鼎甲盛事。

孫司空在豐充講官時扈

駕南苑。園內有廣突出。

上以

御用弓矢授在豐射得之。

上大喜。顧大臣曰。孫在豐文武材也。

丹棧人楊鼎。幼失怙。母子熒熒相守。茅屋一椽。僅蔽風雨。鼎力耕養母。暇則釣於溪。得魚以爲母日用。言笑起居不敢有違。偶與人爭。母呼之立解。雖曲直勿論也。年近三十卒。其母悲痛。目爲之昏。所居荒棘。中心多怖。一夕夢鼎語曰。母勿怖。兒爲母伴。驚覺足底有物。晨起視之。則大蛇蟠屈其上。母駭甚。恍悟夢中語。曰。得非兒所化耶。果爾當首肯。蛇昂首若領之者。

母牀以大竹爲之。竹節皆通。可藏物。蛇自牀下入竹中。夕則復來。鄰里聞之。歎爲奇事。後數年。母去。依舅氏。臨行。啟視。竹中蛇已不知所往。

康熙十七年。御史成其範題爲星占之理可憑。捷音之來伊邇。請

敕令軍士應期征剿。以奏蕩平事。臣竊惟天道至微而難窺。非淺學所可輕議。臣以愚陋書生。何敢妄談。但事關軍國大計。不敢不據實爲我

皇上陳之。臣謹按。五星之占。驗往往不爽。惟災或一

星其應尤速。此司馬遷所謂天子必視熒惑所在也。天文志曰。熒惑行無常。出則有兵。入則兵敗。各以其舍命國。爲亂爲賊。爲疾爲喪。爲饑爲民。所居國受殃。天官書曰。熒惑反道二舍以上。居之三月有殃。殃速至。雖大當小。久而至。當小反大。今年十一月十五。火星退度。其在柳土者無可占驗也。惟自十二月十八。火星退鬼金之宿。二十二。火星退井木之宿。自三十一度起。直至十八年正月初九。退至二十五度而留。留至正月十七而止。夫鬼金之分野。貴州平越府是。

也。井木三十一度至二十五度之分野。雲南大理武定姚安等府是也。據星占而論。論其時則自十二月十八至正月十七止。論其地則自貴州平越府起至雲南八府止。此內當主賊兵自相殘害。一月之內。端倪必見。五月之內。消滅無餘。此必至之應也。說者曰。火星退度。亦有未必盡應者。臣以爲火星退在四水宿則不應。蓋水能克火。火故不能爲厲也。火星退在四土宿則亦不應。蓋火土相生。火亦不能爲厲也。至於火退鬼金。則火能爍金。火退井木。則火逢木而愈。

熾。況火旺南方。鬼井皆南方之宿也。雲貴皆南方之地也。反道正居其野。則逆寇之滅亡所必然耳。臣不知彼地之情形。亦不知兵家之進退。但以星氣之占驗。其理如此。請

敕軍士速應星象。以圖翦滅。則蕩平指日可期矣。如果臣言不謬。伏乞

睿鑒施行。奉

旨知道了。該部知道。欽此。是年吳三桂病死。次年世璠伏誅。雲南平。

歸安嚴侍郎我斯嘗夢至一山僧舍中。見座師及房師諸同年俱僧服訝之。諸公曰。寧忘却此地耶。因問山何名。僧云崧山。忽悟曾晒鞋於階。視之尙未燥。尋寤數日卒。口占偈云。誤落人間七十年。今朝重返舊林泉。崧山道侶來相訪。笑指黃花白鶴前。

山西衛旣齊官檢討以言事忤

旨。謫霸州州判。翰林建言旣齊其一也。歷官至順天府尹。御史陸清獻公隴其亦以言事當謫。旣齊面奏。陸爲縣令時深得民心。今皆恐其遠謫。遂得邀免。衛

與陸初不相識。自後亦不相往來。正如祁奚不見叔向之事。人兩賢之。

丹徒張九裁字禮存。九歲通五經。壬午未冠。領鄉薦。丁未對策。直刺部院督撫陋弊。讀卷者歎曰。此長沙痛哭書也。既奏。擢一甲二名。授編修。

平原董訥字茲重。康熙丁未探花。由編修歷官至江南總督。以閩河事鐫級。補侍讀學士。民爲立生祠。次年

上南巡。民數千執香祠前。求仍放訥爲江南官。

上迴鑾召訥至舟前曰汝做官好江南人爲汝蓋一小廟矣因大笑旋陞漕運總督

德清蔡石公啟傳領順治甲午鄉薦時尙未舉子夫人私蓄三十金爲置一妾妾至垂泣蔡怪而問之曰吾夫以負營債故至此蔡乃夜往其夫家語之曰吾爲爾消釋此事然我不可歸歸則心跡不明卽襍被臥其家天明召營卒至謂曰汝輩違法今不汝較卽繳券付金卒亦感動不取息命轎舁婦還夫然後歸夫人踰年卽舉于是科公車北上有妓欲從蔡蔡賦

羅江怨詞云。功名念。風月情。兩般事。日營營。幾番攪
擾心難定。欲待要倚翠偎紅。捨不得黃卷青燈。玉堂
金馬人欽敬。欲待要附鳳攀龍。捨不得玉貌花容。芙
蓉帳裏恩情重。怎能兩事都成。遂功名。又遂恩情。三
杯御酒嫦娥共。竟去不復顧。康熙庚戌果以第一人
及第。

德清蔡翁築室落成。夢人授以四紅箋。各書大一字。
後孫奕琛官至一品。曾孫啟傳庚戌狀元。元孫升元
壬戌狀元。彬辛酉解元。方悟四一字之兆。翁壽至百

八歲

吳逆叛兵逼建城鎮帥怯而耄欲卽降其屬張遊擊者請戰數卻賊張好著羊紵絳袍單馬入陣戰酣輒袒露半袖驍勇絕倫軍中號曰半邊紅鎮帥忌之誣陷以死一軍皆哭後人弔以詩曰漢將一身當敵騎楚歌千古怨蘭叢何事茅簷諸故老負暄閒說半邊紅

平湖陸閣學秦九歲時值鼎革其父爲馬將軍所獲秦伏草中躍出求代父死將軍愛其文秀以扇示之

曰。兒能讀扇上詩。卽赦汝父。棻朗誦曰。收兵四解降。
王縛。教子三登上將臺。此宋人贈曹武惠王詩也。將
軍不殺人。卽今之武惠王矣。將軍大喜。釋其父。乞爲
己子。棻哭別其父而去。已而將軍物故。得脫歸。康熙
己未舉鴻博入詞林。

聖祖愛其才。一日七遷。官至內閣學士。

打箭爐故旄牛徼外地也。雅州西去大渡河五日程。
羌蠻混雜。連山接野。鳥路沿空。漢永平中。白狼槃木
唐敢等百餘國舉踵奉貢。越山坂負襁而至。皆此種。

類。蜀漢時武侯征孟獲。於此造箭。因名打箭爐。唐韋
皋拒吐蕃。李德裕拒南詔。皆扼大渡河爲險要。宋建
隆三年。王全斌平蜀。議欲因兵威復越雋。藝祖以玉
斧畫所繪圖。曰外此吾不有也。於是爲黎雅之極邊。
曩時河道平廣。可通漕舟。自玉斧畫河之後。河之中
流忽陷五六十丈。河流至此澎湃如瀑。從空而落。春
撞號怒。船筏不通。名曰噎口。殆天設險以限羌蠻也。
元明時番人俱於此地互易茶馬。自明末流寇之變。
商民避兵過河。攜茶貿易。而烏斯藏亦適有喇嘛到。

爐彼此交易。漢番雜處。於是有坐爐之營官。管束往來貿易諸番。我

朝定鼎。德威所被。直通西域。打箭爐一區盡入幅員矣。

聖祖御乾清宮。講官張玉書進講畢。

上問理學之名始於宋否。對曰。道理具在人心。宋儒講辨加詳耳。

上曰。日用常行無非此理。自有理學名目。彼此辨論。言行不符者甚多。終日講理學。而所行全與所言背。

謬豈可謂之理學。若口雖不講而行事昭合。此卽真理學也大哉。

聖人之言。偽學聞之汗浹襟矣。

康熙癸丑春。

天子御講筵。從容謂學士欲得文學之臣。朝夕置左右。惟職經史講誦。給內廬以居之。不令與外事。其慎擇醇謹通達者以聞。時舉編修桐城張英名入對。

上心識之。自是再四諮詢。對者無異詞。遂有內廷供奉之命。

賜邸舍於瀛臺之西。辰而入。終戌而退。

上舊所御讀書處曰

南書房。在

乾清宮之西南隅。

命處其中飲膳給於大官。執書使中涓。紙筆之屬出自

御府。珍果之屬撤自

御饌者。日數至焉。

上御乾清門聽政後。則

國朝新言 卷二
召至懋勤殿。辰巳前講經書。午後講史。率以爲常。此
南書房供奉之始。

高文端公之父都統嵩瞻贈弟斌詩云。與君一世爲
兄弟。今日相逢第二場。想見勲戚大臣國爾忘家之
義。

顧八代字文起。鑲黃旗人。以軍功授戶部筆帖式。擢
吏部文選司郎中。康熙十四年。

聖祖御試旗員。擢八代第一。遷翰林院侍講學士。自
他職改入翰林官。實自八代始。

康熙二十一年六月

上諭部院諸臣。朕因天氣炎熱。移駐瀛臺。今幸天下
少安。四方無事。然每日侵晨御門聽政。未嘗暫輟。卿
等各勤職掌。時來啟奏。曾記宋史所載。賜諸臣於後
苑賞花釣魚。傳爲美談。今於橋畔懸設罾網。以待卿
等遊釣。可於奏事之暇。各就水次舉網。得魚隨其大
小。多寡攜歸邸舍。以見朕一體燕適之意。誰謂東方
曼倩割肉之事。不可見於今日也。特諭。仰見
聖朝喜起明良。一心一德之盛。

桐城張相國英長子廷瓚。康熙己未進士。由編修兩歲中遷至侍讀學士。乙亥六月

上召翰詹八人至暢春園。

賜宴賜扇。英父子皆與焉。

長洲彭定求。康熙丙辰會狀。弟寧求。康熙壬戌探花。孫啟豐。雍正丁未會狀。弟兄鼎甲并祖孫會狀。爲吳中盛事。

康熙己未狀元常熟歸允肅。授修撰兼日講官。進講周易毛詩。舉止端詳。敷奏明暢。湯文正公斌歎曰。講

筵得正人。天下有賴矣。

康熙十七年

詔舉博學鴻詞。十一月初一日奉

旨。各大臣官員題舉才學諸人。俟全到之日考試。其中恐有貧寒難支者。交與戶部酌量給與衣食。用副朕求賢重文之意。欽此。戶部議酌給俸廩併柴炭銀兩。真曠典也。次年三月初一日平明。薦舉人員齊集太和門以魚貫入。

上御太和殿。鴻臚唱行三跪九叩首禮畢。

命赴體仁閣下。大學士捧題出。題二道。璇璣玉衡賦。省耕詩。俱坐地作文。已刻大學士傳。

旨賜宴。凡會試殿試館試狀元庶吉士俱不賜宴。此乃

皇上十分隆重之意。宜訖。

命赴體仁閣。設高桌五十張。每張設四高椅。光祿寺設饌十二色。皆大盃高攢。

賜茶二通。時果四色。後用饅首卷子紅綾餅粉湯各二套。白米各一大盂。又

賜茶訖。復就試。陪宴者大學士掌院學士滿漢各二員。皆南北向坐。謂之主席。以賓席皆東西向也。餘官皆不與。

欽取彭孫通等二十人爲一等。李來泰等三十人爲二等。已仕者照品級授講讀宮坊編修等官。未仕者概授檢討。總充明史館纂修。

長洲吳廷楨字山掄。少試有司。二十三次皆第一。顧不得中。嘗夢泥金報至。己名第八。丙子入陝西籍獲雋。又以冒籍黜。己卯

召試第一。

欽賜舉人。癸未殿試二甲五名。合一甲數之。適符夢兆。

高文良公改庶吉士後。卽乞假歸。閉戶讀書數年。然後就職。前輩之虛心好學如此。

徐州李蟠爲舉子時。嘗夢神人衣冠甚偉。手一楮付之。中有黃金絲糾結成狀元二字。果以康熙丁丑第。一人及第。

姜西溟宸英。工古文。布衣時。

聖祖卽知其名。屢試不售。薦入史館纂修明史。分撰一統志。月給俸錢。衣儒生衣。雜坐公卿之次。丁卯順天鄉試。已擬第二。因二場有點竄堯典舜典一語。爲監場御史所貼。後以丁丑會試中式。殿試進呈卷在二甲第四。

上問有浙江姜宸英乎。內閣學士韓菼對曰。宸英在史館。識其字蹟第七卷當是。

上曰。老名士也。積學能文。至老猶篤。可拔置一甲三名。爲天下讀書人勸。

本朝進士出身最奇者三人。一杞縣任暄猷。明末團練鄉勇以禦流寇。後歸南京爲後軍都督。

王師下江南。投誠隸旗下。順治壬辰進士。以磨勘被黜。又中乙未進士。一邵陽吳芳。崇禎己卯舉人。官至左都御史。投誠後願以科第進。中康熙甲辰進士。一五河錢世燾。鼎革後棄官爲浮屠。久之還俗。應試爲諸生。康熙庚戌成進士。年已七十餘矣。

葉文敏公方霽。官翰林學士時。修四書講義。至羔裘元冠不以弔爲

聖諱。商於同條。俱不能對。翰林典簿穆維乾對曰。大字當仍原字以尊經。小註改元字以避諱。方靄問何所本。維乾曰。中庸慎獨乃原字。小註改謹字。方靄大悟曰。余自幼疑此。始知朱子爲避諱也。深加敬禮。人服其虛中。

王司寇士正謁武侯祠詩云。武興城郭亂山青。肅肅丹青古殿陰。三代僅存魚水契。千年猶聽臥龍吟。世家瞻尙成忠孝。祖德高光式鑒臨。禮樂可興身未死。中原人識老臣心。全集不載。想係初稿。後刪之也。

康熙四十年

聖駕駐蹕郭哈密圖七立。有索和諾蛇哈密獻麟草一方。奏云。此草產於鳴鹿山雷風嶺。必俟千月乃成。非遇

聖朝。未易呈瑞。

鄞縣屠純甫粹忠。垂髫時讀書里中董氏。大書戊戌成名四字於壁間。後果中順治戊戌進士。累官至兵部尚書。先是

聖祖以粹忠老年嬰鑠。

御書修齡堂扁額賜之。又

賜御臨趙孟頫行書曰。白鹿城頭百萬兵。碧油幢下
一書生。如今始識爲儒貴。臥聽元戎報五更。乃大司
馬之預兆也。

宜興任葵尊宏嘉官御史。上疏請定服色。三品以上
始許衣貂裘。捨獬獬。王阮亭先生口占戲贈云。京堂
簪翰兩衙門。齊奪貂裘捨獬獬。昨夜五更寒徹骨。滿
朝誰不怨葵尊。

康熙壬午順天鄉試。五經監生二人。江南武進莊令

與浙江桐鄉俞長策。初以五經違例貼出。仍具題請旨。賜爲舉人。一體會試。嗣後願做五經者聽。

合肥李相國天馥。服闋入都。其壬戌諸門生已多通顯。置酒新第。史侍讀夔卽席賦詩。有郎君館閣稱前輩。弟子門牆半列卿之句。時人比諸唐人鸞掖鯉庭之盛。

陸清獻公令嘉定時被參。魏果敏公象樞上疏力爭。其略曰。陸隴其清操飲冰。愛民如子。賢聲播於都下。臣心竊重之。謂異日可步于成龍之後塵者此人也。

今被議革職。例之所在。臣不敢問。但有此清介之官。正當爲羣僚作榜樣。爲百姓作慈母。今之有司守與德。爲難耳。既知其守與德矣。何不畱以長養百姓云云。有。

旨報聞。一時傳誦。後累官至順天巡撫。辛酉歲入覲。上賚予甚厚。並

賜詩。有郊圻王化始。鎖鑰重臣膺之句。尋擢兩江總督。如陸公之遭際。

聖君可謂不負所守矣。

宣城孫榜眼卓之父勣。故給事中也。父孫翁艱於嗣。一日見市中一僧以火然指。問之曰。願得一茅庵。足供大士像。旁可坐臥誦經。足跡不出門。而免持鉢之苦。久之無一檀越辦此者。故然指耳。翁曰。吾爲師了此願。僧卽罷爇。延至其家。爲結茅如僧言。居三年。一日送客。忽見僧入後堂。問之。則夫人臨蓐得一子矣。方駭異間。庵中人來云。僧已坐化。子一指然痕宛然。劉吏部體仁客鳳陽。一日同友人蘇茂遊銘過龍興寺。訪老衲。流連竟日。始別。蘇歸邸中。夢劉來。笑吟詩。

云。六十年來一夢醒。飄然四大御風輕。與君昨日龍興寺。猶是拖泥帶水行。覺而異之。忽聞剝啄聲。則劉僕至。云已坐脫矣。